

Gobierno ta 'regala' cada estudiante casi 3.000 florin na subsidio

Gerrit Rietveld Academie ta bin Aruba definitivamente otro año toch

ORANJESTAD – E plan pa bin cu Gerrit Rietveld Academie na Aruba ta sigui toch y ta inicia otro año cu cursonan na nivel di HBO. Esaki no obstante e hecho cu comienso di año tabatin un confusion y posibel cancelacion di e plan aki debi na maneho di Gobierno Hulandes.

"Tur esey ta tras di lomba y nos ta cla pa cuminsa otro año cu e cursonan" Julianne Paskel a sigura BONDIA ARUBA ayera. Mes momento e cursonan preparatorio pa e año aki ta cla pa cuminsa na november proximo, y esunnan cu a tuma curso año pasa, ta sigui pa Hulanda

e año aki pa bay Rietveld na Hulanda mes.

Na comienso di año tabatin indicacion cu -despues di un anuncio grandi año pasa cu Rietveld Academie lo bin establece un filial na Aruba- esaki lo a cay na awa. Esaki pasobra Hulanda su Gobierno a dicidi cu ta bay enfoca riba nivel di enseñansa na Hulanda y no den exterior y cu no ta duna aprobacion pa exporta cierto cursonan pa exterior. Como tal a crea e impresion cu esey lo a nifica cancelacion di e proyecto Rietveld na Aruba. Aclaracion di parti di Gobierno di Aruba na Gobierno di Hu-

landa a mostra despues cu Aruba no ta cay den e asina yama 'internacionalisacion di estudio' pasobra nos ta parti di Reino Hulandes. esey a pone cu a confirma cu e intencion di Rietveld pa bin Aruba, lo continua toch y cu lo sigui 'werf' studentenan pa esaki.

Año pasa ora cu a participa e intencion pa bin cu e posibilidad pa studia na e filial di Rietveld na Aruba, a bin cu e 'vooropleiding' cu a genera interes inicial di como 12 alumno local pa dos diferente ramo. Na final di cuenta, 4 a cay afo y 8 a termina esaki cu

exito. For di e ochonan aki, uno a opta pa keda un año mas den vooropleiding cu ta cuminsa e año aki na november. E otronan lo sigui pa Rietveld Academie na Hulanda mes.

Mientrastanto intencion ta pa 'werf' mas estudiante pa cuminsa cu e vooropleiding di e año aki mes, pa cual studentenan mester inscribi na augustus proximo, riba dianan 24 y 27. Segun Paskel, esunnan cu ta menos cu 25 año y cu a caba scol secundario na Aruba (MAVO, HAVO of VWO) por inscribi pa cual nan mester presenta algun proyecto cu lo keda

husga riba dia di e inscripcion mes. Mesun dia e alumno lo haya sa si e la keda acepta pa e vooropleiding.

Loke ta interesante ta cu Gobierno di Aruba den forma di un 'regalo' ta subsidia gran parti di e placa cu mester paga pa e vooropleiding, cu ta suma na casi 4.000 Euro, y ta pone cu e estudiante di Aruba tin cu paga 'apenas' 1.200 florin, sin cu e tin cu paga esaki bek. "E ta un regalo di estimulacion pa tur estudiante cu kier studia den e ramo aki" Paskel a sigui bisa BONDIA ARUBA. □